

NAQQIUT nr. 2

Naqqiutip taarserpaa naqqiut 2. september 2019-imeersoq

Naqqiutikkut iluarsineqarput siunnersuutip kalaallisoortaani siunnersuutip qulequtaa aammalu “§” “51” siorna § 42-mi inissinneqarpoq.

Uunga siunnersuut: Ilinniartut ineqarfii pillugit Inatsisartutinatsisaat nr. xx, xx. xxx 2019-imeersoq

Kapitali 1

Atuuffissaa aamma nassuiaatit

§ 1. Inatsisartut inatsisaat maanna atortinneqassaaq attartortitsigallarnernut, ilinniartut ineqarfiinik, Namminersorlutik Oqartussani atugassiissutigineqartunik tamatumunnga qinnuteqarnermik tunngaveqartumik, ilinniartunut allaneersunut ineqarnissamik pisariaqartitsisunut, ilinniagaqarnerminnut atatillugu, taamaattoq tak. imm. 3.

Imm. 2. Taaguutigineqartumi ilinniartut allaneersut paasineqassaaq ilinniagaqartut minnerpaamik ilinniakkamik aallartitsinnginnermi ukiuni 2-ni illoqarfiup ilinniagaqarfiusussap avataani inuit allattorsimaffianni nalunaarsorneqarsimasut.

Imm. 3. Naalackersuisut pisuni immikkut ittuni, tamatumani minnerunngitsumik pissutsini inunnik ikiorsiinissamut attuumassutilinni, inissaqartitsiniarnerup tamanna ajornartingippagu, ilinniartunut avataaniit aggersuunngitsunut, ilinniartunut inissamik piffissami killilikkami ineqartitsisinnaapput.

§ 2. Ilinniartut ineqarfiat atugassiissutigineqartarpoq piffissap ilinniagaqarfiusup tamarmiusup nalaani, atugassarititaasut kapitalimi 2-mi aalajangersarneqartut naammassineqarsimappata.

§ 3. Naalackersuisut kommunalbestyrelsit isumasioreerlugit ilinniartunut ineqarfinnut malittarisassiorsinnaapput kommunalbestyrelsimit ilinniagaqartunut atugassiissutigineqartartunut ilinniagaqarnermut atatillugu, tamatumani aamma piumasaaqatinik atugassarititaasusanillu attartornermut isumaqatigiissummi.

Kapitali 2

Ilinniartumut inissiamik atugassiissuteqartarnermut atugassarititaasut, aamma qinnuteqartunik tullerriaarisarneq

§ 4. Ilinniartunut inissiat taamaallaat atugassiissutigineqarsinnaapput ilinniartunut:

- 1) danskisut innuttaassuseqartunut, imaluunniit nunat akornanni isumaqatigiissutit Kalaallit Nunaanni atortuutinneqartut naapertorlugit danskisut innuttaassusilinnut sanilliunneqartunut, ilinniagaqartunut inissaqartitaanermut piginnaatitaaneq eqqarsaatigalugu,
- 2) ilinniagaqarnerup nalaani aalajangersimasumik Kalaallit Nunaanni najugaqartumut,
- 3) ilinniakkami tiguneqarsimasumut ilinniakkamillu tapiiffigineqarsinnaasumi ingerlatsisumut, imaluunniit ilinniakkami Naalakkersuisut ilinniagaqarneriutitik tapiiffigineqarsinnaasutut aalajangiiffigisimasaanni ilinniagaqartumut, aamma
- 4) siusinersukkut ilinniartut ineqarfiannik attartornerminut akiitsoqanngitsumut, imaluunniit ilinniartut ineqarfiannik attartorsimanermut atatillugu allatigut akiitsoqanngitsumut, tamatumani aamma pisussaaffinnik sumiginnaasimanermik pissuteqartumik, ilinniartup akilersuinissamut isumaqatigiissutaasimasut eqqortinngippagit.

Imm. 2. Naalakkersuisut, tak. imm. 1, nr. 1 naapertorlugu Kalaallit Nunaannut attaveqavissuunissamik piumasagaammik saneqquatsisinnaanermik aalajangiisinnaapput, pineqarpat tikeraartut ilinniartoq Kalaallit Nunaanni ilinniarfimmi, najugaqarnerullu sivissusaani qaammatit 12-it qaangissanngippagit.

Imm. 3. Naalakkersuisut najugaqartuunissamik piumasagaatip, tak. imm. 1, nr. 2, sanioqqunneqarnissaa akuersissutigisinnaavaat, qularnaarneqarpat ilinniartoq Kalaallit Nunaanni aalajangersimasumik najugaqavissuusoq, naak piffissami pineqartumi Kalaallit Nunaata avataani najugaqaraluarluni.

Imm. 4. Ilinniartunut inissiamik tunineqarsinnaaneq atorunnaassaaq imm. 1-imi piumasagaataasoq ataaseq arlallilluunniit naammassineqarunnaarpata, imaluunniit ilinniartoq ilinniartunut inissiami najugaqartoq § 5-imi pineqartunut ilaajunnaarpat.

Imm. 5. Ilinniartut ineqarfianni ineqartup ilinniakkamik ingerlatsisuunissamik piumasagaammik naammassinnikkunnaarpat, malittarisassat tamatumunnga atuuttut naapertorlugit, taava Naalakkersuisut aalajangersinnaapput ilinniartut ineqarfianni ilinniartoq najugaqartoq piffissami qaammatit 4-t angullugit sivissusilimmi ineqarfimmiiginnarsinnaasoq, pissutsit immikkut ittut tamanna pisariaqartippassuk, tamatumaniissaaq ilinniarsiup uppersarsarpagu ilinniartoq ineqarfimmi ineqartuusoq, naak malittarisassanik pineqartunik naammassinninngikkaluarluni, suli ilinniakkaminik aallussisutut isigineqarsinnaasoq.

§ 5. Ilinniagaqartoq illoqarfimmi ilinniagaqarfimmini allamik inimik atugassaqtitaasoq, imaluunniit aapparisaq imaluunniit inooqatigisaq suliffimminut atatillugu ineqartinneqarpat, pisinnaatitaanngilaq ilinniartutut inissamik atugassinneqarnissamut, imaluunniit atugarisaminik tigumminiinnarnissamik. Tamanna aamma atuuppoq sulisitsisoq sungiusaammik suliffeqarnermut atatillugu inissaqartitsippat ilinniagaqartumut, imaluunniit ilinniagaqartup ineqartinneqarnissamik pisariaqartitsinera nammineq pisariaqartitanik aallaaveqarpat.

§ 6. Ilinniartoq ilinniagaqartunut inissiamik tunineqarsinnaajumalluni, tamatumalu atuinnaarsinnaaneranut Naalakkersuisunut nalunaaruteqassaaq paasissutissanik tamanik, inissamik tunineqarnissamut imaluunniit inigisamik tigumminiinnarnissamut pisariaqartunik,

tamatumunngalu akiliuteqartarnermut pisariaqartunik, tamatumani aamma inimik pisariaqartitsinermit paasissutissanik, inuup normuanik aamma inoqutigiinni ilaasut tamarmik atiinik, inoqutigiit isertitaannik, ilinniakkamik sumi tiguneqarsimanermik, ilinniakkamik ingerlatsinermit, aamma illoqarfiup ilinniarfiup avataani najugaqartarnermik.

Imm. 2. Ilinniartuq ingerlaannartumik Naalakkersuisunut nalunaaruteqassaaq, imm. 1-imi pissutsini pineqartuni allannguuteqartoqarnerani.

§ 7. Naalakkersuisut aalajangersaasinnaapput malittarisassanik innersuussisarnermut innersuussinissamullu tullerriaarisarnermut atugassarititaasunik, tamatumani aamma ilinniartunik allanik avataaneersuunngitsunik tullerriaarisarnermut tunngatillugu.

Kapitali 3

Allaffissorneq

§ 8. Inatsisartut inatsisaat aamma malittarisassat taanna naapertorlugu suliaasut (ilinniartut ineqarfiinut malittarisassat) Naalakkersuisunit allaffissornikkut aqunneqarput, akisussaasusunit attartortitsisarnermut ilinniartullu ineqarfianni ineqarnerup atorunnaarsinneqartarneranut, ilinniartut ineqarfiinut tunngatillugu malittarisassat naapertorlugit, taamaattoq tak. imm. 2 aamma 3.

Imm. 2. Naalakkersuisut tamakkiisumik imaluunniit ilaannakuusumik ilinniartut ineqarfiinik allaffissornikkut aqutsineq Namminersorlutik Oqartussat iluanni oqartussaasunut ingerlatsivinnullu allanut suliaassanngortissinnaavaat.

Imm. 3. Naalakkersuisut allatanik isumaqatigiissuteqarnikkut allaffissornikkut ilinniartut ineqarfiinik malittarisassat tamakkiisumik ilaannakuusumilluunniit kommunalbestyrelsimut imaluunniit suliffeqarfimmut namminersortumut suliaassanngortissinnaavaat.

Imm. 4. Pisortat, ingerlatsiviit aamma suliffiit namminersortut imm. 1-3-mi eqqaaneqartut, pisinnaapput

1) pisortatut oqartussaasunit ilinniagaqartut pillugit paasissutissanik aallernissamut, ilinniagaqartut ineqarfiinut malittarisassat naapertorlugit allaffissornikkut ingerlatsinermit pingaaruteqartunik, aamma

2) akunnerminni paasissutissanik ingerlatitseqqissinnaapput, ilinniartut ineqarfiinik allaffissornikkut aqutsinermit pingaaruteqartunik, akunnerminnilu paasissutissat taamaattut atorsinnaallugit.

Imm. 5. Naalakkersuisut aalajangersagaliorsinnaapput allaffissornikkut aqutsineq pillugu, tamatumani aamma ilusissanik piffissalersuinernillu qinnuteqartarnermi, aamma ilinniartut ineqarfiinik ingerlatsinermi, tamatumani aamma imm. 1-3 naapertorlugit suliaassanik isumaginninnernut, ineqartunut siunnersuisoqatigiinni sulianut immikkut akissarsiaqartitsisarnermut, aamma paasissutissanik piniartarnermut, atugassiisarnermut ingerlatitseqqittarnermullu, tak. imm. 4.

Imm. 6. Aalajangersakkat pisortat ingerlatsineranni suliaassat suliarineqartarnerat pillugu Inatsisartut inatsisaanni aamma pisortat ingerlatsinerat pillugu paasitneqarsinnaatitaaneq pillugu Inatsisartut inatsisaanni atuupput, imm. 3-mi eqqaaneqartunut suliffinnut

namminersortunut, taakkua Inatsisartut inatsisaat manna imaluunniit malittarisassat Inatsisartut inatsisaat naapertorlugu suliaasut naapertorlugit tamakkiisumik imaluunniit ilaannakuusumik ilinniartut ineqarfiinut malittarisassat naapertorlugit ilinniartut ineqarfiinik allaffissornikkut aqutsisuutinneqarpata.

§ 9. Ilinniartut ineqarfiinik allaffissornikkut aqutsinermi, tak. § 8, ilaapput ulluinnarni ilinniartut ineqarfiinik aqutsineq aamma ilinniartut ineqarfiini ataasiakkaani namminerni suliassat, ilinniartut ineqarfiinut atuuttut malittarisassat naapertorlugit.

Imm. 2. Ilinniartut ineqarfiinut allaffissornikkut malittarisassat aqunneqarneranni qularnaarneqassaaq ilinniartut ineqarfiisa isumannaatsumik ingerlanneqarnissaat, ilinniartullu ineqarfiinik ingerlatsineq sapinngisamik pitsaanerpaamik isumagineqassasoq.

Imm. 3. Allaffissornikkut aqutsinermi ineqartut soqutigisaat pitsaanerpaamik isumagineqassapput.

§ 10. Naalackersuisut ilinniartut ineqarfikkaartumik ileqqorissaarnissamut malittarisassanik aalajangersaassapput, atortuulertartussanik ineqartunut saqqummiunneqareeraangamik.

Imm. 2. Ileqqorissaarnissamut malittarisassat, tak. imm. 1, Naalackersuisunit akuerineqareernerminni pisortanit, ingerlatsivinnit aamma namminersortut suliffiutaannit aalajangerneqarsinnaapput atuuttussatut, tak. § 8, imm. 2 aamma 3.

Imm. 3. Naalackersuisut ileqqorissaarnissamut malittarisassiorsinnaapput, tamatumani aamma ileqqorissaarnissamut malittarisassat unioqqutinneqarnerini kinguneritinneqartartussat mianersoqqussuteqarnikkut imaluunniit anisitaanikkut pisartussat pillugit

§ 11. Naalackersuisut pilersissinnaavaat utaqqisunut allassimaffik, ilinniartut ineqarfiini ineqartut qanoq sivisutigisumik ineqartuusimani aamma inissamik pisariaqartitsineri aallaavigalugit.

Imm. 2. Ilinniartut ineqarfiata iluani utaqqisunut allattorsimaffimmik pilersitsisoqartarpat, ilinniartut ineqarfiinut allaffiup aalajangersassavai tamanullu takusassiaralugit utaqqisut allassimaffianni inissinneqartarnermut atugassarititaasut.

Kapitali 4

Ineqartut siunnersuisoqatigiivi

§ 12. Ilinniartut ineqarfiini ataasiakkaani Naalackersuisut ilinniartut siunnersuisoqatigiivi pilersissinnaavaat, taakkualu suliassarissavaat:

- 1) aaqqissuuttarnissaat aamma agguaattarnissaat ulluinnarni ilinniartut ineqarfianni najugaqartut akornanni suliassat,
- 2) qularnaassallugu ilinniartut ineqarfianni najugaqartut ulluinnarni toqqissisimasunik killiliussanik atugassaqartitaanissaat,
- 3) nakkutigissallugu ilinniartut ineqarfianni ileqqorissaarnissaq, aamma
- 4) nakkutigisarissallugu illup aserfallatsaalinerata paarineqarneratalu ajunngitsuunissaa.

Kapitali 5

Attartornermut isumaqatigiissuteqarneq kiisalu ineqarnermut akiliummik annertussusiliisarneq akiliisarnerlu, atuineq aamma qularnaveeqqusiissut

§ 13. Ilinniartut ineqarfiannik attartorneq pillugu isumaqatigiissuteqarneq pissaaq attartornermut isumaqatigiissummi naqitami Naalakkersuisunit akuerisaasumi. Attartornermut isumaqatigiissummi ilaassaaq pequtit allassimaffiat takussutissiaq.

Imm. 2. Ilinniartut ineqarfianni ineqartup kingusinnerpaamik iserternermini attartornermut isumaqatigiissut atsiussavaa.

Imm. 3. Ilinniartut ineqarfianni ineqartup attartornermut isumaqatigiissummik atsiuinerminut atatillugu ilinniartut ineqarfianni ileqqorissaarnissamut malittarisassat assilineqarnerannik tunineqassaaq.

§ 14. Attartornermut isumaqatigiissuteqarnermi qularnaveeqqusiissutitut akiliutissaq akilerneqassaaq, ilinniartut ineqarfianni ineqartup sillimmasiissutaatut ineqarfimmiit nuunnissaminut pisussaaffigiumaagaanut, taamaattoq tak. § 53.

§ 15. Ilinniartunut inissiani ineqarnermut akiliut qaammammum siumoortumik akilerneqartassaaq, tak. § 16. Qaammatikkaartumik ineqarnermut akiliutip saniatigut akilerneqartassapput kiassarnermik, innaallagissamik, gas-imik aamma imermillu atuinermut akiliutit, taamaattoq tak. § 53.

Imm. 2. Atuinermut imm. 1 naapertorlugu akiliutissat ilinniartut ineqarfianni ineqartup atuinera tunngavigalugu akilerneqartarput. Ilinniartumut inigisap naammaannartuunerata kingunerippagu nalinginnaasumiit annertunerusumik inigisap assinganut atuineranut akiliuteqartoqartarnera, atuinermut akiliutissami naapertuuttumik annikilliliisoqassaaq.

§ 16. Ineqarnermut akiliutissaq aalajangersarneqartassaaq pissutsit tulliuuttut tunuliaqutaralugit, taamaattoq tak. § 53:

- 1) Ilinniartumut inissiap angissusia.
- 2) Ilinniartumut inissiaq pequsersugaanersoq pequsersugaannginnerlorluunniit.
- 3) Ineqarfimmi ineqartup, tamatumaniissaaq ineqartut allat inoqutigiittut isertitaat.

Imm. 2. Ineqarnermut akiliut ukiumoortumik naleqqussarneqartassaaq, akiliutissap naleqqussarnissaanut procentimik, Inatsisartut inatsisaat maannakkorpiaq akissarsiat naleqqussarneqartarnerannut naapertorlugu.

§ 17. Ilinniartut ineqarfianni najugaqartoq ineqarnermut akiliutissamik qaammatikkaartumik siumoortumik akiliisassaaq, piffissami ineqarnermut isumaqatigiissutaasumi aalajangersakkat naapertorlugit, taamaattoq tak. imm. 4.

Imm. 2. Akiliineq pisassaaq kingusinnerpaamik ullup akiliiffissap qaangiunnerani ulluinnaat pingajuata qaangiutinnginnerani. Ulloq maanna nalliuttuuppat imaluunniit arfininngorneruppat, ulluinnarmi tulliuuttumi akiliineq piffissamik eqquisutut isigineqassaaq.

Imm. 3. Naalackersuisut akiliiffissamik innersuussissapput, taamaattoq tak. imm. 4. Akiliiffissamik innersuussisoqarsimangippat ineqarnermut akiliutissaq ilinniagaqartut ineqarfiinut allaffiup najugaanut akilerneqassaaq. Aningaaserivimmut imaluunniit allakkerivimmut akiliineq akiliiffissamut innersuuneqartumut akiliinertut isigineqassaaq.

Imm. 4. Ilinniartut ineqarfianni najugaqartoq ilinniagaqarnersiuteqarpat, taava Naalackersuisut ineqarnermut akiliutissaq ilinniagaqarnersiutinik akiliinerminni ilanngaatisinnaavaat, tak. § 26, imm. 1, nr. 1 aamma 2, Ilinniagaqarnersiutit pillugit Inatsisartut inatsisaanni, taamaattoq tak. § 53.

§ 18. Naalackersuisut ineqarnermut akiliutissap naatsorsorneqartarneranut malittarisassanik aalajangersaassapput, tamatumani aamma isertitat naleqqussartarnerinut, qularnaveeqqusisarnermut, ineqarnermut akiliutissamik akiliisarnermut, kiassarnermut, innaallagissamut, gas-imut aamma imermut, tamatumani aamma atuineranut akiliutissani naapertuuttumik annikilliliisarnermut, taamaattoq tak. § 53.

Kapitali 6

Ilinniartup ineqarfiata angissusissaa pitsaassusissaalu

§ 19. Ilinniartumut inissiamik atugassiinermi isiginiarneqassapput ilinniartumut inissami ineqartumut malinnaasut inoqutigiit, ilinniagaqartup meerai 18-it inorlugit ukioqarpata, aappaa imaluunniit inooqatigissaa pisinnaatitaammata akiliunneqarlutik angalasinnaanermut, tamatumunnga malittarisassat ilinniagaqarnersiuteqarnermut malittarisassani naapertorlugit, taamaattoq tak. imm. 2.

Imm. 2. Ilinniartut ineqarfianni ineqartup piumasarisinnaanngilaa ineqarfigisap aalajangersimasumik angissuseqarnissaa aamma pitsaassusissaa, tamatumani aamma nammineq immikkut ilinniartutut ineqartinneqarnissi imaluunniit ilinniartunut inissiap pequsersugaareernissaa imaluunniit pequsersugaannginnissaa, taamaattoq tak. imm. 1, § 20, imm. 2 aamma §21.

§ 20. Naalackersuisut ilinniartut ineqarfiannik ilinniartumut ineqartussamut atugassiissapput piffissamiit attartornerup aallartiffissaatut isumaqatigiissutigineqartumiit.

Imm. 2. Ilinniartumut inissiaq attartorfiup aallartinneqarani isumannaatsuussaaq pissusissamisoorlumillu pitsaassuseqassalluni.

§ 21. Naalackersuisut malittarisassiorsinnaapput ilinniartumut inissiap qanoq pitsaassuseqarnissaa attartornerup aallartinnerani pillugu, tamatumani aamma pequsersugaanissaanut, atortulersugaanissaanut aamma matuersaatinut tunngasuni.

§ 22. Ilinniartunut inissiaq attartornerup aallartinnerani amigaateqarpat, taava ilinniartup ineqartup Naalackersuisut amigaataasut pillugit nalunaarfigissavai kingusinnerpaamik attartornerup aallartinneraniit ullut 14-it qaangiutinnginneranni. Tamannali atuutinngilaaq

amigaataasut paasineqarsimasinnaanngippata nalinginnaasumik malussarniarnikkut, tak. aamma § 39.

Imm. 2. Naalakkersuisut ilinniartut ineqarfianni najugaqartoq pisussaaffilersinnaanngilaat amigaataasunik iluarsaaqqullugu, ilinniartut ineqarfianni najugaqartup iserternerminiit ullut 14-it qaangiutinnginneranni Naalakkersuisunut erseqqissaatigereersimasaanik.

Kapitali 7

Aserfallatsaaliineq aamma iluarsaasarneq

§ 23. Naalakkersuisut isumagissavaat ilinniartut ineqarfianni sumiiffiit ataatsimoorussat isumannaatsumik aserfallatsaaliineqarnissaat.

Imm. 2. Naalakkersuisut pisussaaffigaat teknikkimut tunngasumik atortulersuutit, kuuffinnut, kiassarnermut, innaallagissamut, gas-imut aamma imermut atortut pitsaasumik atorsinnaassuseqarnissaasa nakkutigineqarnissaat. Assigisaanillu Naalakkersuisut pisussaaffigaat innaallagissamut ikkuffiit, naqqup sinaani iikkiussat, matserfiit, kiassaait, ruujorit, skaaviit iikkamiittut, pequtit, atortut allallu aserfallatsaaliineqarnissaat.

Imm. 3. Nutarterisarnerit imaluunniit allatut iluarsaasarnerit ajorsisoqarneratigut nungullartunilluunniit Naalakkersuisunit isumagitinneqartassapput akuttunngitsumik, pisariaqassusianut ilinniartut ineqarfiata qanoq ittuunera naapertorlugu.

§ 24. Ilinniartut ineqarfianni najugaqartup ingerlaannartumik ajoqutit Naalakkersuisunut nalunaarutigisassavai.

§ 25. Ilinniartut ineqarfianni najugaqartup pissutissaviusumik pissuteqanngitsumik Naalakkersuisut itigartissinnaanngilai ilinniartut ineqarfiannut takusaanissaannik, taakkua:

- 1) ilinniartut ineqarfiat misissorniarpasuk, allannguutaasimasinnaasut takujumallugit,
- 2) aserfallassimassutsimik nakkutilliinermi,
- 3) iluarsagassanik suliaqarniarlutik, imaluunniit
- 4) ilinniartut ineqarfiat misissorumallugu attartorteqqinneqalinnginnerani.

Imm. 2. Misissuinermi nakkutilliinermiluunniit paasineqarpat paarinerluisoqarsimasoq, ilinniartut ineqarfianni ineqartup ingerlaannartumik ajoqusikkat iluarsaatissavai, tamanna Naalakkersuisunit piumasarineqarpat.

Imm. 3. Naalakkersuisut siumut sap. ak. 2-nik ilisimatitsillutik ilinniartut ineqarfianni iluarsaaneq aallartitsissinnaavaat. Taamaattoq Naalakkersuisut qaqugukkulluunniit siumoortumik nalunaaruteqaratik iluarsagassanik kinguartinneqarsinnaanngitsunik suliaqarsinnaapput.

Imm. 4. Suliaq sunaluunniit Naalakkersuisunit aallartinneqartoq akornuserneqanngitsumik suliarineqassaaq, sapinngisamik annertunerpaamik ilinniartunik ineqartunik soqutigittartumik. Naalakkersuisut ingerlaannartumik iluarsaaqqinnerit suliarisassavaat.

Kapitali 8

Ilinniartut ineqarfianni ineqartup ineqarfimmik atuinera

§ 26. Ilinniartut ineqarfianni ineqartut, kiisalu inuit ilinniartunit ineqarfinnut isersinnaatitaasut ileqqorissaarnissamik malittarisassanik ilinniartut ineqarfiannut atuuttunik eqquutitsissapput, tak. § 10.

§ 27. Ilinniartut ineqarfianni ineqartup ineqarfik isumannaatsumik atugarissavaa, ajoqusiinernullu taarsiisussatut akisussaaffeqarluni, nammineq, inoqutimi akornanni imaluunniit ilinniartut ineqarfiannut isersinnaatitaminiit illersorneqarsinnaanngitsumik pissusilersortoqarnerinut.

§ 28. Ilinniartut ineqarfianni ineqartup pisussaaffigaa nammineq aningaasartuutigissallugu imminut ilinniartut ineqarfiannut suliffiup nalinginnaasup avataani mattussimaguni iserniarnini.

Imm. 2. Ilinniartut ineqarfianni ineqartup ineqarfimmu matuersaat annaasimaguniuk, matuersaammut nutaamut aningaasartuutit nammineq akilissavai.

§ 29. Ajoqusiisoqarpat ajutoornikkut ilinniartut ineqarfiata ilaani Naalakkersuisut eqqiluitsuutitassaanni, ilinniartut ineqarfianni ineqartup ingerlaannartumik Naalakkersuisut tamanna pillugu nalunaarfigissavai.

§ 30. Ilinniartut ineqarfianni ineqartup ineqarfik Naalakkersuisunit akuerineqanngitsumik allamut atorsinnaanngilaa, tamatumani aamma:

- 1) ilinniartut ineqarfianni inisimasoqarluni,
- 2) ilinniartunut inissiaq allanut atugassiissutigisinnaanagu,
- 3) inissiaq allanut attartortillugu, imaluunniit
- 4) ilinniartunut inissiami ineqartorlu alla inigisanik paarlaallutik.

§ 31. Inerteqqutaavoq ilinniartut ineqarfianni ineqartup Naalakkersuisunit akuerineqanngitsumik:

- 1) Ilinniartut ineqarfianni atortulersuutunik allannguisinnaanera, taamaattoq tak. § 32.
- 2) Uumasuteqarneq.
- 3) Nassarnissaat toqqortarinissaallu aallaasit ilinniartut ineqarfianni, tamatumani aamma nammineq ilinniartutut inigisami. Aallaasit akuerisaasut nassarneqartut toqqortarineqassapput skaavimmi parnaartartumi Naalakkersuisuni.

§ 32. Ilinniartut ineqarfianni najugaqartoq siumoortumik Naalakkersuisunut isumaqatigiissuteqareernikkut pisinnaatitaavoq nammineq akilikkaminik atortorissaarutunik nalinginnaasunik ilinniartunut ineqarfimmi ikkussuinissaminut, internet-imut attavimmik, tv-mut attavimmik aamma innaallagissiuutitalinnik attavinnik allanik, taamaattoq tak. imm. 2. Naalakkersuisut akuersissummut ilanngullugu aalajangiisnaapput atugassarititaasunik, tamatumani aamma atortulersuutit ikkunneqannginneranni pissutsinut utertitseqqinnissamut.

Imm. 2. Ilinniartut ineqarfianni ineqartup pisinnaatitaanera imm. 1 naapertorlugu atuutissanngilaq Naalakkersuisut nalunaarutigippassuk ilinniartut ineqarfianni innaallagissiuit naammattumik atorsinnaassuseqanngitsut, imaluunniit atortulersuutit ineqarfimmut tassaniluunniit najugaqartunut ajoqutaassasut.

§ 33. Ilinniartut ineqarfianni najugaqartoq siumoortumik Naalakkersuisuniit allaganngorlugu akuersissuteqarfigineqartoq ikiorsiissutitut atortulersuutinik ikkussuisinnaavoq, soorlu aggersaasarnermi attaveqaatinik, usilersorfimmik pilersitsineq, uffarfimmik allannguilluni suliaqarneq imaluunniit immikkut aaqqiissusiineq, igaffik aamma matut isumaginninnermut tunngasumik inatsisit naapertorlugit. Naalakkersuisut akuersissuteqarnerminnut atatillugu piumasaqaatigisinnaavaat ilinniartut ineqarfianni ineqartup ineqarfimmik qimatsilernermini pissutsit isikkorisimasaannut uterteqqissagai, tamatumalu akuerineqannginnerani kommunalbestyrelsimiit qularnaveeqqusiissummik piniartoqarsimanissaa, pissutsit isikkorisimasaannut uterteqqinnissaannut ilinniartunut ineqarfimmi najugaqartup aninerani aningaasartuutitut matussutissat pillugit.

§ 34. Ilinniartut ineqarfianni najugaqartoq ineqarfimmiit nuussinnaanngilaq siumoortumik Naalakkersuisunut isumaqatigiissuteqarani, tak. § 42, imm. 1, nr. 4.

Imm. 2. Imm. 1-imik eqquutitsinnginnermi ilinniartut ineqarfianni najugaqartoq ineqarnermut akiliummik akiliisussaatitaassaaq, attartornermut isumaqatigiissutit eqqortumik piffissaliilluni atorunnaarsinnissaanik nalunaaruteqarnissami tungaanut, tak. § 38, imm. 1.

Kapitali 9

Atuisinnaatitaanerup allanut tunniunneqarnera

§ 35. Naalakkersuisut pisinnaatitaapput pisariaqartikkunikku ilinniartut ineqarfianni najugaqartoq inissamik allamik innersuussinnaallugu, annertuunik iluarsaanernik ineqarfimmi suliaqartoqassatillugu, imaluunniit ilinniartut ineqarfianni najugaqartut inoqutigiit ilaat ilinniartup ineqarfianiit nuussimappata.

§ 36. Ilinniartut ineqarfianni najugaqartoq piffissami aalajangersimasumi sungiusaammik suliffeqarallartussaaguni, imaluunniit ilinniariartussaguni illoqarfiup ilinniagaqarfiusup avataani, pisussaavoq ilinniartutut najugaqarfigisaminik peqannginnermini Naalakkersuisunut atugassiinissamut, ilinniartut ineqarfianni najugaqartoq ilinniartoq minnerpaamik qaammatit marluk peqanngittussaaguni. Tamannali atuutissanngilaq ilinniartup illoqatigisaani inoqutigiinni ilaappata meeqqat 18-it inorlugit ukiullit, aapparisaq imaluunniit inooqatigisaq, akiliunneqarlutik angalasinnaatitaasut, ilinniagaqarnerisuteqarnermut malittarisassat atuuttut naapertorlugit.

Imm. 2. Ilinniartut ineqarfianni najugaqartup ilinniartutut inigisaminik Naalakkersuisunut atugassiisussa, tak. imm. 1, peqannginnermini ineqarnermut akiliteqassanngilaq.

Imm. 3. Ilinniartut ineqarfianni najugaqartup ineqarfigisaminik Naalakkersuisunut atugassiisussaasoq, tak. imm. 1, pequtiminik Naalakkersuisut aaqqissuussaannik

toqqortarititsisinnaavoq, ilinniartut ineqarfiat atugassiissutigineqarsimasoq atugassiinermi pequersugaanngippat.

§ 37. Ilinniartup ineqarfia atugassiissutigalugu tunniunneqarsinnaanngilaq ilinniartup najugaqartup aappaanut imaluunniit inooqataanut, taamaattoq tak. imm. 2.

Imm. 2. Atuisussaaitaanerup allamut tunniunneqarnera imm. 1 naapertorlugu, taamaallaat pisinnaavoq nutaamik ilinniartunut inissiamik Naalakkersuisunut qinnuteqareernikkut. Inissiamik atugassiissuteqarnej taamaallaat pisinnaavoq tunngavigalugu aappaasup imaluunniit inooqataasup ilinniartut ineqarfiannik atugassinneqarnissamut piumasagaataasunik naammassinissimanerani.

Kapitali 10

Taamaatitsineq aamma atorunnaarsitsineq

Ilinniartut ineqarfianni najugaqartup taamaatitsinera aamma atorunnaarsitsinera

§ 38. Taamaatitsineq ilinniartut ineqarfianni najugaqartup tungaaniit pissaaq allaganngorlugu minnerpaamik qaammammik ataatsimik siumoortumik ilisimatitsinikkut, attartornermut isumaqatigiissutaasumi sivikinnerusumik piffissaliisoqanngippat.

Imm. 2. Ilinniartut ineqarfianni najugaqartup piffissap sinnerani ineqarnermut akiliutaasussat akilertussaavai, ilinniartut ineqarfiani najugaqartoq ineqarfimmiit nuuppat piffissaq isumaqatigiissutaasoq sioqqullugu.

Imm. 3. Ilinniartut ineqarfianni najugaqartoq inigisamiit nuuppat piffissaq isumaqatigiissutaasoq sioqqullugu, imaluunniit suli taamaatitsinissamut piffissaliussaasoq naanngitsoq, taava Naalakkersuisut anguniassavaat ilinniartunut inissiap sapinngisamik sukkasuumik allamut attartortilernissaa. Ineqarnermut akiliutit attartortitseqqilernikkut imaluunniit attartortitseqqilertoqarsimasuuppat isertinneqartussat ilanngaatigineqassapput Naalakkersuisut piumasagaatissaanni ilinniartumut ineqarfimmiit anisumiit.

§ 39. Ilinniartunut inissiaq piffissap attartorfiusup aallartinnerani amigaateqartitserpat, tak. §§ 20 aamma 22, ingerlaannartumillu Naalakkersuisut amigaataasut iliuuseqarfiginngippatigit, imaluunniit piffissap naapertuuttup iluani iliuuseqarfigineqarsinnaanngippata, ilinniartut ineqarfianni najugaqartup attartornermut isumaqatigiissut atorunnaarsissinnaavaa, amigaataasut pingaaruteqartutut isigineqarpata. Amigaataasut iliuuseqarfigineqarpata ilinniartut ineqarfianni najugaqartup attartornermut isumaqatigiissutaasoq suli atorunnaarsinngikkaa, ilinniartut ineqarfianni najugaqartup kingusinnerusukkut amigaataasimasut attartornermik isumaqatigiissummik atorunnaarsitsinermut pissutaatissinnaanngilai.

Naalakkersuisut taamaatitsinerat aamma atorunnaarsitsinerat

§ 40. Naalakkersuisut attartornermut isumaqatigiissut ilinniartut ineqarfianni najugaqartumut atorunnaarsittassavaat ilinniagaq imaluunniit ilinniarfimmiinneq naammassippat imaluunniit unitsineqarpat, imaluunniit ilinniartut ineqarfianni najugaqartup ilinniartut ineqarfianni najugaqarnissamut piunasaqaatit naammassiunnaarpagit, taamaattoq tak. imm. 3 aamma § 51, imm. 2. Ilinniakkamik ingerlatsinnginneq tamatumani ilinniakkamik taamaatitsinertut isigineqassaaq, soorlutaaq taamaatitsineq orlov-eqarnikkut, tamatumani aamma naartunermut meerartaarnermullu atatillugu sulinngiffeqarneq ilinniakkamik taamaatitsinertut isigineqassasut, taamalu ilinniartut ineqarfianni najugaqarsinnaajunnaarnertut, tak. imm. 2.

Imm. 2. Ilinniakkamik, ilinniarfimmiinnermik, sungiusaammik suliffeqarnermik naammassisaqarnermi, ilinniarfimi ilinniakkamik taamaatitsinermi ilinniartut ineqarfianni najugaqartoq nooreersimassaaq ulluinaat 10-t qaangiutinnginnerini, ilinniakkap, sungiusaammik suliffeqarnerup imaluunniit uninnerani imaluunniit taamaatinnerani, taamaattoq tak. imm. 3.

Imm. 3. Ilinniartut ineqarfianni najugaqartoq ilinniakkamiit anisitaaguni anisitaanerlu naammagittaalliutigalugu allaffissornikkut oqartussanut allanut, taava ilinniartut ineqarfianni najugaqartoq pisinnaatitaavoq inigisaminiiginnarnissaminut, anisitaaneq pillugu inaarutaasumik aalajangertoqarnissaata tungaanut.

§ 41. Naalakkersuisut § 40-mi periarfissat eqqaaneqartut avataasigut ilinniartut ineqarfianni najugaqartoq najugaqarfianiit anisussanngorlugu isumaqatigiissut atorunnaarsissinnaavaat, tak. § 51, imm. 2, ilinniartut ineqarfianni najugaqartoq allaganngorlugu mianersoqqusissuteqartoqareernerata kingorna

- 1) ilinniartutut inigisani isumannaatsumik periaaseqarfigisimangippagu, tak. § 27,
- 2) § 31-imi aalangersakkat unioqutissimappagit,
- 3) pitsaasumik ileqqoqarnissaq pissusilersornissallu peruserisimangippagit, tamatumani aamma ileqqorissaarnissamut malittarisassat, tak. § 26, imaluunniit ineqartunut allanut akornutaappat, naak pissusilersornera ingasattajaarnerunngikkaluortoq, annersaanertaqartumik imaluunniit aserorterinertaqartumik, tak. §§ 42 aamma 43, Naalakkersuisut attartornermut isumaqatigiissummik atorunnaarsitsisinnaaffigisaannik.

Imm. 2. Naalakkersuisut imm. 1 naapertorlugu atorunnaarsitsinerat allaganngorlugu suliaassaaq.

§ 42. Naalakkersuisut attartornermut isumaqatigiissut atorunnaarsissinnaavaat, tak. § 51, imm. 2, pisuni imaattuni:

- 1) Ineqarnermut akiliutissamik akiliisoqartanngippat, tak. § 17, imm. 1.
- 2) Ilinniartut ineqarfianni najugaqartup inigisani isumannaatsumik periaaseqarfiginngippagu, tak. § 27.
- 3) Ilinniartut ineqarfiat isumaqatigiissutaasut avataatigut atorneqarpat, tak. § 30.
- 4) Ilinniartut ineqarfianni najugaqartoq inigisamiit nuuppat Naalakkersuisunut isumaqatigiissuteqarani, tak. § 34.

- 5) Naalakkersuisunit akuerineqanngitsumik aallaasinik ilinniartut ineqarfianni toqqortaartoqarpat, tak. § 31, nr. 3.
- 6) Ilinniartut ineqarfianni najugaqartup akornusersorpagu Naalakkersuisut ilinniartut ineqarfiannut isersinnaanerit, § 25 naapertorlugu.
- 7) Ileeqqorissaarnissamut malittarisassat ingasattajaartumik unioqqutinneqarpata, tak. § 26.
- 8) Atortut imaluunniit pequtit ilinniartut ineqarfianni najugaqartumut atugassiissutigineqartut attartornermut isumaqatigiissummut atatillugu sumiginnarneqarpata. Tamanna aamma atuuppoq atortunut pequtinullu ilinniartut ineqarfianni inini ataatsimoorussaniittut pineqartillugit.

§ 43. Naalakkersuisut attartornermut isumaqatigiisut atorunnaarsissinnaavaat ingerlaannartumik atulertumik, ilinniartut ineqarfianni najugaqartoq pissusilersorpat annertuumik ineqarfimmu akornutaasumik, ilinniartut ineqarfianni najugaqartunut allanut, ilinniartut ineqarfianni sulisunut aamma allanut ilinniartut ineqarfianniissinnaasunut, tamatumani aamma:

- 1) ilinniartut ineqarfianni najugaqartoq annersaappat imaluunniit annersaaniarluni soorasaarippat,
- 2) ilinniartut ineqarfianni najugaqartup pissusilersornera avatangiisuni ulorianartorsiortitsippat, tamatumani aamma sakkunik atuinikkut imaluunniit ilinniartut ineqarfiannut ulorianaatilinnik toqqortaqarnermigut, imaluunniit,
- 3) paasineqarpat ilinniartut ineqarfianni najugaqartoq tigumiaqartoq imaluunniit atuisoq aangajaarniutinik nakorsaattit atorneqanngitsunik.

Imm. 2. Kiisalu aamma attartornermut isumaqatigiisummik atorunnaarsitsisoqarsinnaavoq ingerlaannartumik atuutilersumik, pissusilersorneq imm. 1-imi pineqartoq ingerlanneqarpat, ilinniartut ineqarfianni najugaqartup inoqutigisaanit imaluunniit allanit ilinniartut ineqarfianni najugaqartup ineqarfimmu isersinnaatissimasaanit.

§ 44. Naalakkersuisut attartornermut isumaqatigiisut atorunnaarsippassuk, tak. §§ 42 aamma 43, taava ilinniartut ineqarfianni najugaqartoq ingerlaannartumik ilinniartut ineqarfianniit nuussaag, aammalu ineqarnermut akiligassat akilissallugit, aningaasartuutillu allat attartornermut isumaqatigiissummut atasut, piffissami ilinniartut ineqarfianni najugaqartup aninissaata tungaanut atuuttut, nalinginnaasumik ilisimatitsinikkut nuunnissami, tak. aamma imm. 3. Taamaattoq pisumi namminermit naliliineq tunngavigalugu Naalakkersuisut nuunnissamik kinguartitsisinnaapput ullut 5-it angullugit.

Imm. 2. Attartornermut isumaqatigiisummik atorunnaarsitsineq pissuteqarpat aangajaarniutinik tigumiarnermik imaluunniit toqqortaqarnermik, annersaanermik imaluunniit tamanna pillugu soorasaarinermit, tak. § 43, imm. 1, nr. 1 aamma 3, taava Naalakkersuisut piumasarisinnaavaat ilinniartut ineqarfianni najugaqartup ingerlaannartumik atulersumik ilinniartut ineqarfiat qimassagaa.

Imm. 3. Ilinniartullu ineqarfianni najugaqartup aammattaag taarsiivigissavai annasaqarnerit suulluunniit, unioqqutitsinermit pissuteqartut, tamatumani aamma ilinnartup ilinniartut ineqarfianniit anisitaanerani aningaasartuutaasut.

Imm. 4. Naalakkersuisut anguniassavaat ilinniartut ineqarfiata allamut attartorteqqinnissaa. Ineqarnermut akiliutit isertitat Naalakkersuisunut akilerneqartut imaluunniit akilerneqartussaagaluit, piffissami imm. 1-imi pineqartumi, ilinniartut ineqarfianni najugaqarsimasumut piunasaqaataasunit ilanngaatigineqassapput.

§ 45. Attartornermut isumaqatigiisummik taamaatitsinermi aamma atorunnaarsitsinermi §§ 40-43 naapertorlugit Naalakkersuisut pisussaaffeqanngillat ilinniartut ineqarfianni najugaqartup inissarseqqinnissaanik.

Imm. 2. Naalakkersuisut attartornermut isumaqatigiisummik ingerlaannartumik atortuulersumik atorunnaarsitsinermini § 43, imm. 1, nr. 1 aamma 3 naapertorlugit ilinniartut ineqarfianni najugaqarsimasoq ilinniartut ineqarfiannik attartorsinnaajunnaarallartissinnaavaat piffissami aalajangersimasumi ukioq ataaseq qaangernagu sivilissuseqartumi.

Kapitali 11

Ilinniartut ineqarfianni najugaqartup nuunnera

§ 46. Ilinniartut ineqarfianni najugaqartup ineqarfimmik qimatsinermini ilinniartut ineqarfiat utertissavaa iserternermisulli pitsaassuseqartillugu.

Imm. 2. Naalakkersuisut inigisamik qimatsinermi attartornermut isumaqatigiisut naapertorlugu qularnaveeqqusissutitut akiliutaasut atorsinnaavaat ilinniartut ineqarfianni najugaqarsimasup pisussaaffiinut aningaasartuutitut matussutissatut, iluarsaanermut, attartukkap eqqiarneqarneranut, inigisamullu akiitsuusinnaasut akiitsuunniit allat ilinniartut ineqarfiannut tunngasut aningaasartuutiginerinut.

§ 47. Ilinniartut ineqarfianni najugaqartup nuunneranut atatillugu Naalakkersuisut inigisap misissorneqarsimaneranut nalunaarusiamik suliaqassapput, tassanilu nalunaarneqassapput amigaataasut aamma paarinerluineq Naalakkersuisut isumaat naapertorlugu ilinniartut ineqarfianni najugaqarsimasup akisussaaffigisai. Misissuisimaneranut nalunaarusiaq imaqassaaq allaganngorlugit missingersuusianik suliasanut Naalakkersuisut naliliinerat naapertorlugu ilinniartut ineqarfianni najugaqarsimasup akiligassaannik suliarineqartussanik.

Imm. 2. Naalakkersuisut patsisigippassuk amigaateqartoq imaluunniit paarinerluisoqarsimasoq ilinniartunut inissiamik qimanneqartumik, taava Naalakkersuisut tamanna uppernarsaasissavaat immikkut pappialatigut, assersuutigalugu assilisatigut, video-mik immiussakkut imaluunniit inunnik uppernarsaasuliinikkut.

Imm. 3. Kingusinnerpaamik ilinniartut ineqarfianniit nuuttoqarneraniit sap. ak. ataaseq qaangiuppat misissuisimaneranut nalunaarusiaq ilinniartut ineqarfiannik qimatsisimasumut ilinniartumut nassiunneqassaaq. Ilinniartut ineqarfianni najugaqarsimasup misissuisimanermit nalunaarusiap imarisai isumaqatiginngikkunigit sap. ak. ataaseq qaangiutsinnagu ilinniartut ineqarfianni najugaqarsimasup oqaaseqaatigiumasani nassiussimassavai, taakkualu Naalakkersuisut nalunaarusiami ilanngutissavaat.

§ 48. Ilinniartut ineqarfianni najugaqarsimasoq misissuisimanermut nalunaarusiamut oqaaseqaatinik nassiussaqaanngippat, tak. § 47, imm. 3, taava Naalackersuisut pisinnaatitaassapput misissuisimanermit nalunaarusiaq tunngaviutissallugu ilinniartut ineqarfianni najugaqarsimasup qularnaveeqqusiissutaasa iluarsaanermi aningaasartuutitut matussutaatinnissaanut, tak. § 46, aammalu ilinniartut ineqarfianni najugaqarsimasup attartornermut isumaqatigiissummut atatillugu aningaasartuutaanut matussutitut atornissaannut.

§ 49. Ilinniartut ineqarfianni najugaqarsimasup kingusinnerpaamik nuunnerminiit ullut 8-t qaangiutinnginneranni allagannorlugu Naalackersuisunut nalunaarutigissavaa najugaq nalunaarutit il.il. ingerlatinneqartarfissaat.

§ 50. Naalackersuisut akisussaangillat pigisanut ilinniartut ineqarfianni najugaqarsimasup qimataanut.

Imm. 2. Naalackersuisut ilinniartut ineqarfianni najugaqarsimasumut nuussimasumullu minnerpaamik sap. ak. ataatsimik piffissaqartitsererlutik pigisat aaneqarnissaannut, pigisat igitissinnaavaat imaluunniit tuniniarsinnaallugit ilinniartut ineqarfianni najugaqarsimasup akiligassaanik, pigisat piffissaliussap iluani aaneqarsimangippata. Eqqaaneq aamma pisinnaavoq ilinniartut ineqarfianni najugaqarsimasup najukkani nalunaarutiginnippagu, tak. § 49.

Imm. 3. Naalackersuisut apeqqaatinnagu imm. 2-mi piffissaliussaq pisussaapput pigisat annertuunik nalillit piffissami sivisunerusumi qaammatit 3-t angullugit sivissuseqartumi paarsarinissaannut, ilinniartut ineqarfianni najugaqarsimasup akiligassaanik.

Imm. 4. Iluanaarutaasut imaluunniit iluanaarutaasimasinnaasut pigisat tuniniarnerisigut ilanngaatigineqassapput Naalackersuisut ilinniartut ineqarfianni nuussimasumut piunasaqaatissaanni, pigisat toqqortarisimanerannut aamma attartornermut isumaqatigiisummik tunngaveqartumik ilinniartut ineqarfianni najugaqarsimasumit pisussaaffigineqartunut, tamatumani aamma aningaasartuutitut iluarsaatitsinermit, eqqiaanermut attartugaasimasumik, ineqarnermut akiliutissanut akiitsorineqartunut, imaluunniit akiitsunut allanut ilinniartut ineqarfiannut attuumassuteqartunut.

Kapitali 12

Maalaarutit

§ 51. Pisortanit, ingerlatsivinnit aamma suliffinnit namminersortunit aalajangiinerit pillugit maalaarutit Inatsisartut inatsisaanni § 8, imm. 2 aamma 3 naapertorlugit Naalackersuisunut suliassangortinneqassapput aalajangiisoqarneraniit sap. ak. 2-t qaangiutinnginneranni.

Imm. 2. Maalaarutit §§ 40, 41 aamma 42 naapertorlugit pisut aalajangernermik atorunnaarsitsissapput. Maalaarutit § 43 naapertorlugu pisut aalajangernermik atorunnaarsitsissapput Naalackersuisut naliliinnippata ilinniartut ineqarfianni najugaqartup ingerlaqqittumik ilinniartut ineqarfianniinna annertuumik inissiamut, ineqartunut allanut

imaluunniit allanut ilinniartut ineqarfianniissinnaasunut, tamatumani aamma ilinniartut ineqarfianni sulisunut annertuumik ajoqutaassasoq, tak. § 44, imm. 2.

Imm. 3. Naalakkersuisut malittarisassiorsinnaapput maalaaruteqartarnermut, tamatumani aamma ilusissanik aamma elektroniskiusumik maalaaruteqarsinnaanermut.

Kapitali 13

Atortuulersitsineq, atorunnaarsitsineq aamma piffissamut ikaarsaarfiusumut tunngatillugu aalajangersakkat

§ 52. Inatsisartut inatsisaat manna atortuulerpoq ulloq 1. august 2020, taamaattoq tak. § 53.

Imm. 2. Ilutigisaanik atorunnaarsinreqarpoq Ilinniartut ineqarfii pillugit Namminersornerullutik Oqartussat nalunaarutaat nr. 18, ulloq 1. november 2007-imeersoq, aamma Inissianik attartortitsisarneq pillugu Inatsisartut peqqussutaanni nr. 2, 12. maj 2005-imeersumi § 3, imm. 3.

§ 53. Naalakkersuisut malittarisassiussapput §§ 15, 16, aamma 18-ip atortuulerfissaannik aamma aalajangersakkat taakkua tunngavigalugit malittarisassat atortuulerfissaannik.

Imm. 2. § 15, 16 aamma 18-ip atortuulernissaata tungaanut ineqarnermut akiliutissap qularnaveeqqusiissutissallu annertussusissaat aningaasanut inatsimmi annertussusilerneqartassapput.

Imm. 3. § 15-ip atortuulernissaasa tungaannut kiassarnermik, innaallagissamik, gas-imik aamma imermik atuinerneq akiliuteqartoqartassanngilaq.

Namminersorlutik Oqartussat, ulloq xx. xxx 2019

Kim Kielsen